

Na osnovu člana 5. i 29. Zakona o Vladi Tuzlanskog kantona ("Službene novine Tuzlanskog kantona", br. 17/00, 1/05, 11/06 i 13/11), a u vezi sa članom 29. i 31. Zakona o izvršenju Budžeta Tuzlanskog kantona za 2011. godinu ("Službene novine Tuzlanskog kantona", br. 4/11 i 11/11), Vlada Tuzlanskog kantona na sjednici održanoj dana 17.11.2011. godine,
d o n o s i

ODLUKU

o utvrđivanju kriterija, uslova i postupka za raspodjelu sredstava sa potrošačke jedinice 11010024 – subvencioniranje kamata za stambeno zbrinjavanje mladih

I OPĆE ODREDBE

Član 1.

Ovom odlukom utvrđuju se kriteriji, uslovi i postupak raspodjele sredstava sa potrošačke jedinice 11010024 – subvencioniranje kamata za stambeno zbrinjavanje mladih.

Član 2.

Raspodjela sredstava za subvencioniranje kamata za stambeno zbrinjavanje mladih vršit će se iz Budžeta Tuzlanskog kantona za 2011. godinu i u skladu sa Zakonom o izvršenju Budžeta Tuzlanskog kantona za 2011. godinu u ukupnom iznosu do 50.000,00 KM.

Član 3.

Pod subvencioniranjem kamata podrazumijeva se odobravanje novčanih sredstava na ime kamata za odobrene kredite za rješavanje stambenih potreba mladih.

Pod rješavanjem stambenih potreba mladih podrazumijeva se kupovina stana, rekonstrukcija i/ili adaptacija stambenog prostora.

Kandidati koji su u prethodnim godinama bili korisnici sredstava za subvencioniranje kamata za stambeno zbrinjavanje mladih mogu se ponovo prijaviti na javni poziv. Tim kandidatima će se broj osvojenih bodova umanjiti za 20%.

Pravo na apliciranje imaju kandidati koji dostave potvrdu od banke da do momenta apliciranja imaju urednu otplatu kredita prema planu otplate.

Subvencioniranje kamate će se realizovati samo po urednoj uplati glavnice rate za koju se vrši subvencija.

Član 4.

Sredstva za subvencioniranje kamata za stambeno zbrinjavanje mladih dodjeljuju se na osnovu Javnog poziva.

Javni poziv se objavljuje u dnevnim novinama, RTV TK i na zvaničnoj Web stranici Vlade Tuzlanskog kantona (u daljem tekstu: Vlada) www.vladatk.kim.ba.

Prijave na javni poziv za raspodjelu sredstava se dostavljaju u roku od 15 dana od dana posljednjeg objavljivanja u dnevnim novinama.

II OPĆI USLOVI ZA PODNOSIOCA PRIJAVE

Član 5.

Opći uslovi koje podnosilac prijave za dodjelu sredstava treba ispuniti su:

- (1) da ima manje od navršenih 35 godina života u godini u kojoj podnosi prijavu [dokaz: Izvod iz matične knjige rođenih ili ovjerena kopija CIPS-ove lične karte]
- (2) da nema riješeno stambeno pitanje na teritoriji Bosne i Hercegovine [dokaz: ovjerena izjava podnosioca prijave da on ili članovi porodičnog domaćinstva nisu nosioci stanarskog prava, vlasnici stana ili useljive porodične kuće na teritoriji Bosne i Hercegovine do dana

zaključenja ugovora o kreditu za stambeno zbrinjavanje i ovjerena izjava bračnog druga da nije nosilac stanarskog prava, vlasnik stana ili useljive porodične kuće ukoliko je riječ o zajedničkom apliciranju bračnih drugova]

- (3) da posjeduje ugovor sa bankom o kreditu za stambeno zbrinjavanje [dokaz: Ugovor o kreditu i Plan otplate]
- (4) da je državljanin Bosne i Hercegovine [dokaz: Uvjerenje o državljanstvu]
- (5) da ima mjesto prebivališta na području Tuzlanskog kantona [dokaz: CIPS obrazac BPA3]
- (6) da do momenta apliciranja ima urednu otplatu kredita prema planu otplate [dokaz: potvrda od banke da do momenta apliciranja postoji uredna otplata kredita].

Član 6.

Članovima porodičnog domaćinstva u smislu ove Odluke smatraju se bračni drug, djeca rođena u braku i van braka i usvojenici.

III POSEBNI USLOVI I KRITERIJI ZA OCJENJIVANJE

Član 7.

Posebni uslovi i kriteriji za ocjenjivanje, odnosno određivanje broja bodova i utvrđivanje reda prvenstva podnosioca prijave su:

I	1. Stepen stručne spreme	maksimalno 22 boda
II	2. Priznati uspjesi u oblasti nauke, tehnike, kulture, umjetnosti, informisanja i sporta, te renomirana javna priznanja	maksimalno 25 bodova
III	3. Učešće u oružanim snagama 4. Nosioc ratnog priznanja 5. Član porodice šehida, poginulog, umrlog, nestalog borca i umrlog ratnog vojnog invalida 6. Stepen invalidnosti	maksimalno 25 bodova
IV	7. Broj članova porodičnog domaćinstva 8. Zajedničko apliciranje bračnih drugova	maksimalno 25 bodova

Član 8.

(Određivanje broja bodova)

1. *Stepen stručne spreme*

doktor nauka	20 bodova
magistar	17 bodova
VSS	14 bodova
VŠS	11 bodova
V stepen	8 bodova
SSS	5 bodova

1.1. Učenik generacije srednje škole i/ili Zlatna plaketa Univerziteta 2 boda

Na broj bodova iz tačke 1. dodaje se broj bodova iz podtačke 1.1.

Navedena stručna sprema podrazumijeva i odgovarajući ekvivalent u skladu sa Odlukom o usvajanju osnova kvalifikacijskog okvira u Bosni i Hercegovini.

[dokaz: ovjerena kopija odgovarajuće diplome, svjedodžbe ili uvjerenja].

2. Priznati uspjesi u oblasti nauke, tehnike, kulture, umjetnosti, informisanja i sporta, te renomirana javna priznanja za rezultate rada

Pod renomiranim priznanjima i nagradama se podrazumijeva osvojena I, II ili III nagrada u oblasti nauke, tehnike, kulture, umjetnosti i informisanja odnosno I, II ili III mjesto na službenim međunarodnim i državnim takmičenjima u oblasti sporta (Olimpijske igre; svjetska i evropska prvenstva; Mediteranske igre; svjetski i evropski kupovi; Svjetske igre; svjetske, evropske i međunarodne lige koje se boduju za prvenstva i službene rang-liste službenih međunarodnih organizacija pojedinih grana sporta, odnosno ostvarena vrhunski dostignuća u navedenim oblastima u životnoj dobi od 15 – 35 godina).

- 2.1 Dobitnik svjetskih renomiranih priznanja i nagrada u oblasti nauke, tehnike, kulture, umjetnosti, informisanja i sporta 20 bodova
 - 2.1.1. Osvajač prvog mjesta/nagrade 5 bodovaNa broj bodova iz tačke 2.1. dodaje se broj bodova iz podtačke 2.1.1.
- 2.2 Doprinos kroz patente dokazane ili certificirane od strane ovlaštenih institucija i doprinos u nauci, tehnici i tehnologiji kroz inovacije dokazane ili certificirane od ovlaštenih institucija 20 bodova
- 2.3 Dobitnik evropskih renomiranih priznanja i nagrada u oblasti, nauke, tehnike, kulture, umjetnosti, informisanja i sporta 15 bodova
 - 2.3.1. Osvajač prvog mjesta/nagrade 2 bodaNa broj bodova iz tačke 2.3. dodaje se broj bodova iz podtačke 2.3.1.
- 2.4 Dobitnik renomiranih priznanja u državnim ili regionalnim okvirima u oblasti nauke, tehnike, kulture, umjetnosti, informisanja i sporta 10 bodova
 - 2.4.1. Osvajač prvog mjesta/nagrade 1 bodNa broj bodova iz tačke 2.4. dodaje se broj bodova iz podtačke 2.4.1.
- 2.5 Objavljen udžbenik, odobren od nadležnih institucija za upotrebu u obrazovnim ustanovama
 - 2.5.1. samostalno 5 bodova
 - 2.5.2. koautorstvo 2 bodaMaksimalan broj bodova po tački 2.5. iznosi 10 bodova.

[dokaz: isprava i mišljenje nadležne institucije iz pojedinih oblasti (Rektorat odgovarajućeg univerziteta, Akademija nauka i umjetnosti Bosne i Hercegovine, Sportski savez Bosne i Hercegovine i sl.)]

3. Učešće u oružanim snagama RBiH

- Vrijeme provedeno u odbrambeno-oslobodilačkom/domovinskom ratu od 18.09.1991. do 23.12.1995. godine 10 bodova
- za svaku godinu učešća u Oružanim snagama RBiH 2 boda
- za svaku nepunu godinu učešća u Oružanim snagama RBiH, pod uslovom da to iznosi najmanje tri mjeseca 1 bod

[dokaz: Uvjerenje izdato od strane nadležnog organa o učešću u oružanim snagama RBiH]

4. Nosioci ratnog priznanja

- Nosilac ratnog priznanja, u smislu člana 2. Zakona o posebnim pravima dobitnika ratnih priznanja i odlikovanja i članova njihovih porodica („Službene novine Federacije BiH“, broj: 70/05) 10 bodova

[dokaz: Rješenje o dobijanju ratnog priznanja izdato od strane nadležnog organa].

5. Član porodice šehida, poginulog, umrlog, nestalog borca i umrlog ratnog vojnog invalida

.....10 bodova

Član porodice šehida, poginulog, umrlog, nestalog borca i umrlog ratnog vojnog invalida u smislu ove Odluke smatra se aktivni korisnik prava na porodičnu invalidninu,

na osnovu konačnog rješenja nadležnog organa izdatog u skladu sa važećim federalnim propisima iz oblasti boračko – invalidske zaštite.

[dokaz: Rješenje izdato od strane nadležnog organa].

6. Stepen invalidnosti

- za invalide sa 60% invaliditeta 5 bodova
- za svakih narednih 10% invaliditeta dodaje se 5 bodova

[dokaz: Rješenje o stepenu invalidnosti izdato od strane nadležnog organa]

7. Broj članova porodičnog domaćinstva

Za svakog člana porodičnog domaćinstva, uključujući podnosioca prijave 3 boda

[dokaz: Ovjereni izjavi o zajedničkom domaćinstvu (kućna lista)].

8. Zajedničko apliciranje bračnih drugova

Bračni drugovi apliciraju zajedno jednom prijavom. U slučaju da oba bračna druga posjeduju ugovor o kreditu, potrebno je odrediti nosioca prijave i o istom dostaviti izjavu potpisanu od strane oba bračna druga. U slučaju zajedničkog apliciranja bračnih drugova nosilac prijave dostavlja Izvod iz matične knjige vjenčanih.

Nosilac prijave obavezno i za bračnog druga dostavlja propisanu dokumentaciju o ispunjavanju općih i posebnih uslova, osim uslova o posjedovanju ugovora o kreditu za stambeno zbrinjavanje.

Broju bodova koje dobije nosilac prijave dodaje se jedna trećina bodova koje dobije njegov bračni drug.

Član 9.

(Kriteriji dodjele sredstava prema broju bodova)

Dodjela sredstava vršit će se po utvrđenoj rang listi do visine raspoloživih sredstava planiranih u Budžetu Tuzlanskog kantona za 2011. godinu. Pojedinačni iznos sredstava na ime subvencioniranja kamata jednak je ukupnom iznosu kamate obračunate u 12 uzastopnih mjesečnih rata prema Planu otplate, počev od 01.01.2012. godine. Pojedinačni iznos sredstava ne može preći iznos od 3.000,00 KM. U slučaju jednakog broja bodova prednost na rang-listi se daje podnosiocu zahtjeva koji je dobio veći broj bodova prema redoslijedu kriterija iz člana 7. ove Odluke.

IV POSTUPAK PODNOŠENJA I RJEŠAVANJA PO PRIJAVI ZA SUBVENCIONIRANJE KAMATA

Član 10.

Prijava za subvencioniranje kamata podnosi se Savjetu za nevladin sektor i pitanja mladih Vlade Tuzlanskog kantona (U daljem tekstu: Savjet) u roku određenom u javnom pozivu.

Uz prijavu se prilažu isprave i dokazi o ispunjavanju općih i posebnih uslova, odnosno kriterija utvrđenih u javnom pozivu.

Član 11.

Savjet po prijemu prijave provjerava ispunjavanje općih uslova na osnovu dostavljene dokumentacije i isprava priloženih uz prijavu.

Prijavu podnosioca koja ne ispunjava opće uslove Savjet ne može prihvatiti.

Savjet vrši bodovanje prijavi podnosilaca koje ispunjavaju uslove u skladu sa članom 8. ove Odluke i sačinjava prijedlog Rang liste kandidata, koju dostavlja Komisiji za administrativna pitanja Vlade Tuzlanskog kantona (u daljem tekstu: Komisija).

Komisija sačinjava prijedlog Programa raspodjele sredstava i dostavlja ga Vladi na usvajanje.

Član 12.

Korisnik sredstava iz Programa raspodjele sredstava će Uredu Vlade dostavljati dokaz o uplati rate (glavnice i kamate) za svaka tri mjeseca, nakon čega će Vlada dati nalog za uplatu novčanih sredstava na račun korisnika sredstava u visini naznačene tromjesečne kamate.

V NADZOR

Član 13.

Nadzor nad namjenskim utroškom sredstava vršit će Savjet za nevladin sektor i pitanja mladih Vlade Tuzlanskog kantona.

VI PRELAZNE I ZAVRŠNE ODREDBE

Član 14.

Uredne dokaze o ispunjavanju općih i posebnih uslova iz ove Odluke podnosilac prijave dostavlja u originalu ili ovjerenoj fotokopiji dokumenata koji nisu stariji od tri (3) mjeseca.

Član 15.

Ova Odluka stupa na snagu danom donošenja, a objavit će se u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: 02/1-05-21102-3/11
Tuzla, 17.11.2011. godine

PREMIJER KANTONA

Sead Čaušević